

4247. SQUILLACEN.

Rñus Archipresbyter Curatus Vallisfloritae, Squillacensis Dioeceseos, de consensu sui Rñi Episcopi Administratoris Apostolici, a Sacra Rituum Congregatione sequentis dubii solutionem humillime expostulavit; nimirum:

An in Missa solenni et aliis functionibus, in Ecclesiis, quibus est carentia magistri organi vel cantorum, etiam laicorum, liceat uti machina vulgo dicta *Grammofono*, pro cantu stricte liturgico gregoriano, partium variabilium aut invariabilium Missae solennis, Hymnorum et aliorum Canticorum?

Et Sacra eadem Congregatio, exquisito Commissionis Liturgicae suffragio, proposito dubio respondendum censuit: Negative.

Atque ita rescripsit, die 11 Februarii 1910.

4248.

CANONICORUM REGULARIUM
LATERANENSIIUM
CONGREGATIONIS AUSTRIACAE.

Rñus Moderator Generalis Canonice Regularium Lateranensium, Congregationis Austriacae, Praepositus et Abbas S. Floriani, Sacrorum Rituum Congregationi ea quae sequuntur pro opportuna declaratione humillime exposuit; nimirum:

I. Ab ultimo ante tres annos defuncto Parrocho perinsignis Ecclesiae Abbatialis S. Floriani, praedictae Congregationis, exstructum fuit in ipso oppido S. Floriani Nosocomium, cuius administratio, iuxta statuta suae fundationis, penes Parochum pro tempore supradictae Ecclesiae residere debet. Iamvero in Capella seu Sacello dicti Nosocomii, in quo quotidie Missa celebratur ab uno ex Canonicis supramemoratae Abbatiae, usu venit ad Divina peragenda Directorium seu Calendarium Canonice Regularium.

II. Iisdem Canonicis Regg. S. Floriani, in parva Civitate *Wochlabruch*, est Ecclesia Parochialis, cui iam tempore Imperatoris Iosephi II adnexa fuit municipalis Ecclesia, in qua pariter usu venit Calendarium Canonice Regularium.

III. In eadem Civitate *Wochlabruch* est domus Sororum scholis addictarum (*Schul-schwestern*), apud quas multae puellae bonis litteris instituendae degunt. In domo hac duo

habentur Sacella, in quibus Sacrum peragitur, et quae a duobus Canonicis Regularibus supradictae Abbatiae S. Floriani inserviuntur, cum ipsis demandata fuerit ab Episcopo Linciensi cura spiritualis tam Sororum quam puellarum.

Hisce expositis, quaeritur: An in primo, secundo et tertio casu adhiberi valeat Directorium seu Calendarium proprium Canonice Regularium Lateranensium praefatae Congregationis?

Et Sacra eadem Congregatio, exquisito Commissionis Liturgicae suffragio, omnibus sedulo perpensis, ita rescribere rata est:

Ad I. Negative.

Ad II. Affirmative, dummodo Ecclesia sit filialis Ecclesiae Parochialis, vel praefatae Congregationi Canonice Regularium Lateranensium concredita.

Ad III. In Sacello principali publico vel semipublico, negative; in altero Sacello, utpote privato, affirmative; iuxta Decreta, n. 3862, Urbis et Orbis, 9 Decembris 1895, et n. 3910, Ruthenen., 22 Maii 1896.

Atque ita rescripsit, die 11 Februarii 1910.

4249.

ROMANA.

Sacrorum Rituum Congregationi proposita sunt, pro opportuna solutione, sequentia dubia; videlicet:

I. Utrum ad Missam votivam Officio votivo Sanctorum Apostolorum Petri et Pauli respondentem, in Vigilia Omnium Sanctorum, sub die 30 vel 31 Octobris, tertia Oratio debeat esse *Concede nos, famulos tuos*, de Beata Maria Virgine; an potius *Deus, qui corda fidelium* de Spiritu Sancto, quae ad Missam ipsius Vigiliae uti secunda praescribitur?

II. Utrum Festum Titulare Ecclesiae Cathedralis cum sua Octava, extra ipsam Cathedrali, habendum sit tamquam Festum primum, vel secundarium?

III. Utrum Anniversarium Dedicationis Ecclesiae Cathedralis cum sua Octava, extra ipsam Cathedrali, sit aestimandum tamquam Festum primum, an vero ceu Festum secundarium?

IV. Utrum in Festis Sanctorum Francisci Xaverii, Antonii Patavini et Aloisii Gonzagae, si pro Lectionibus I Nocturni recurrendum sit ad Commune Confessorum, Lectiones sint sumendae e primo, an potius e secundo loco?